



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8



Myanmar military tekolakbai bendanger teyari meshi



Vietnam Open: Kapila shirangba ajanga semi masayatsüsa aküm

VOL. XXI ISSUE NO. 333 (ADOK 333) DIMAPUR AMUNGNÜ (SUNDAY) RONGJUI (SEPTEMBER) 15, 2024 ₹ 5.00

Assam Rifles-i Naga Civil Service Probationary Officers nem training agütsü

Kohima, September 14, 2024 (Agencies): Assam Rifles-i Naga Civil Service Cadre Probationary Officers 14 asoshi hopta ka orientation programme ayongzuka agiogo.

Iba sentong ajanga Assam Rifles maparen, jenjang aser anogoshia inyaksangshiba metetdaksü ta PRO, HQ IGAR (North)-i sangdong ka nung ashi.

Hopta ka sentong nung probationary officers-i weaponry demonstrations, practical exercises, field operations aser

yimtsüng lennirtem den ajurutepa sensaksema liasü. Parnokisa Inspector General Assam Rifles North den ajurutepa sensaksem.

Iba sentong ya civil aser military ketdangsurtem tsüngda akhümtsübu aser amalitep alitsü tangatetba agütsüba den Assam Rifles maparen meteta lidaktsütsü nükjidong nung ayongzuka agi.

Iba orientation programme takok ngua agiba ajanga Naga Civil Service aser Assam Rifles tsüngda tesentaktep akangshiba nung mera tulu ka agiogo ta PRO-isa ashi.

Naga nunger longjemba sentong nung state sorkari yariteptsü



September 14, 2024 nü Indira Gandhi Stadium, Kohima nung Deputy Chief Minister Y Patton den NSF, ASU ketdangpurtem aser asayartem külemi agiba noksa ka angur.

Kohima, September 14, 2024 (TYO): Nagaland state sorkari saisapong aser sobaliba tashi angateta lir aser Naga nunger ka kümdaktsütsü atema item wadang asoshi sen agüja yariteptsü ta Deputy Chief Minister Y. Patton-i ashi.

24 buba NSF Martyrs' Memorial Trophy tenzükba sentong nung Patton-i iba osang metetdaksü.

NSF Martyrs' Memorial Trophy ya Angami Students' Union (ASU) ajanga ayongzuka amonger aser Honibar nungi Indira Gandhi Stadium Kohima nung "Goal for Peace" omen nung ajemdaker tenzükogo.

"Onoki saisapong aser sobaliba tashi angateta lir aser maneni asen lanur, shilem agirtem aser asenok külemi longjemdaksüba sentongtem yaritsü" ta Y Patton-i ashi.

Chief Minister Neiphiu Rio lenisüba kübok state sorkari yimjung, telongiem aser terenlok ajungketba sentongtem nungita yaritsü ta pai ashi.

"Ozü sorkari saisapongertem anitetsü aser asen lanurtemi national aser international sabangtem nung takok angutsü atema sports infrastructure

tajungba kümdaktsütsü" ta Patton-isa shisem.

"ASU-i anibelem arema iba asayamong ayonga agiba atema pelar. Nenoki saisapong ajanga telongjem adokdaktsütsü merangba atema tenüngsang agütsür. Nenoki inyakba mapa ajanga lanurtem ya tarutsü temelenshi bener arurtem ta bilemtetdaksür" ta pai ashi.

"Goal for Peace" omen ajanga asenok ajak taginüba aser tarutsü asoshi mangdang ayuba nenshir. Goal ka yok shia asenoki asen külem nükjidong atongtsü tashi aliba meteter. Asenok goal meydatsüi noktanga ajanga asenok külem taginübatem kümzüka ayuba angur ta Patton-i ashi.

"Football asaydak asenoki angubatam ajanga asenoki teti atema yimjung bener arutsüba mapa nung külemi inyakba, asalentong yangluba aser kati ka nungita yaritepba sayur. Tanü lanur saisapongertem ya asüng lennirtem lir aser nenok ya yimjung ambassadors, telongiem milentong amertem aser tarutsü tajung atema champions lir" ta paisa ashi.

"Nenok dak ajungmesotsü,

tangatetba melenshidaktsütsü aser aputem yanglutsü tashi lir. Nenoki goal yokba agi dang takok anguba masadangtsü saka nai na meketa alirtem dak kongshiba ajanga dang takok asadangtsü" ta Y Patton-i ashi.

Asür Kekuojalie Sachü aser asür Vikhozo Yhoshü na bilemteta ASU-i kümshia NSF Martyrs' Memorial Trophy ayonga amonger. Taküm iba asayamong nung telok 43-i shilem agir aser October 5 nü tembangtsü.

NSF Martyrs' Memorial Trophy takok angur nem Rs 3 lakh aser tanabuba jenjang angur nem Rs 1.80 lakh senpettem agütsütsü. Maneni semi-final atonger nem Rs. 40,000 aser quarter-final atonger nem Rs 25,000 senpettem agütsütsü.

Iba dakji alia best midfielder, defender aser top scorer shia nem Rs. 10,000 agütsütsü aser player of the tournament nem Rs. 50,000 agütsütsü.

Tanü agiba sentong nung ASU president Khriesamhalie David Mere-i tesentepertem pelaa agizük aser Naga Students' Federation (NSF) president Medovi Rhi-i pusemba onük jembi.

UIDAI-i Aadhaar update mapang atsülanger

New Delhi, September 14, 2024 (Agencies): Unique Identification Authority of India (UIDAI)-i Aadhaar portal nung angati kulikakettem upload asütsüba mapang atsülangogo.

UIDAI-i December 14, 2024 tashi mapang atsülangba metetdaksüogo. Iba ajanga Aadhaar Number Holders crore aika ajangzüksü imlar aser iba ya myAadhaar portal nung dang inyaktetsü.

Tesüiba nung UIDAI-i September 14, 2024 tashi nung fee ka agüja aadhaar profile nung kulikakettem upload süa temelenshi asütsü mapang züngzükja liasü.

Aadhaar number holders-i küm 10 nung khenbosa Aadhaar nung kulikakettem upload asütsüla. Nübertemi December 14 matongdang kulikakettem upload süa jangjashiba mapa

meinyakra iba sülenbo Aadhaar details update asütsü atema Rs 50 agütsü.

Aadhaar number holders-i ration card, voter ID, domicile certificate, passport, mesüra passbook amala upload asütsü akok. Item kulikaket ya MyAadhaar Portal nung Aadhaar number aser registered mobile number nung one-time password (OTP) agütsüba sülen inyaktetsü.

Online ajanga iris scans, fingerprints aser facial photographs update mesütetsü ta UIDAI-i metetdaksüogo.

UIDAI-i ashiba agi kinü tanur sozükli sülen birth certificate aser pei tsürabur Aadhaar number agütsür Aadhaar yanglutsü akok.

Ajisüaka, arishi küm 5 aser 15 ajungdang tanur indang Aadhaar biometrics update asütsüla ta parnokisa ashir.

Assam sorkari tanü internet noktanger

Guwahati, September 14, 2024 (Agencies): Assam nung Deobarnü Class-III government posts atema recruitment exam agütsü aser iba nung tashishitsü melii aser tiptema agütsü atema sorkari "temporary internet ban" asütsü metetdaksüogo.

September 15, 2024 anepdang 10:00 ako nung nikongdang 1:30 ako tashi tatidang agiba mapang internet shibangtsü ta Home & Political department-i Honibarnü metetdaksü.

Tatidang agidang mobile applications aser internet connectivity ajanga ashikülak aser tim masüba mapa inyaker ta asüba agi Assam sorkari iba lemtet agiogo.

"Candidates aika asüba den tatidang tiptema agütsü atema onoki iba mapa inyaker. Recruitment process timi dang agir ta public dang sayutsü aser meinprong kecha malitsü atema internet services shibangtsü" ta

Additional Chief Secretary to the Government of Assam Ajay Tewari-i ashi.

Iba tenokdangba anema inyakerterem Indian Telegraph Act, 1885 aser Bharatiya Nyay Sanhita, 2023 kübok temerenshi alitsü ta sorkar sangdong nungsa shia lir.

Asüng Assam kübok districts 28 kübok centres 2,305 nung Class-III government posts atema written examination agütsü.

Iba tatidang nung candidates lakh 11 tema lir aser tesüiba nung auyazüka züluba atema centres 429 tashi 'sensitive' ta züngoka lir.

WhatsApp, Facebook, X aser Telegram amala mobile apps ajanga tatidang nung tim masüba mapa inyaksü akok ta sorkari tsübu bilemer.

Assam State Level Recruitment Commission-i Secondary Education Board of Assam (SEBA) den yaritepa iba tatidang agir.

KSC Jotsoma tenzükba anogo aser Annual Alumni Lecture Series agi

Kohima, September 14, 2024 (TYO): September 14, 2024 nü Kohima Science College (KSC) Jotsoma nung 63 buba College Foundation Day cum Annual Alumni Lecture Series-II ayonga agiogo.

KSCJ Alumni Association Vice President Rhosietho Nguori-i okila jembidang iba sentong ajanga college-i ajangshia aruba maitsü sayur ta ashi.

"KSCJ Alumni Association ya professionals, advocates aser medemertem külemi yaritepba telok ka lir aser tarutsü kaketshirtem anitetsü asoshi inyaker" ta pai ashi.

Tanü adenshia aliba alumni

aika wadang balala nung tetsüng ajemoka inyaker ajisüaka onok taküm shia nung iba reju ajanga sayuba teti lir, ta Nguori-isa ashi.

Alumni Association ya 2007 küm tentet aser iba sülen nungi kaketshirtem asoshi mapa balala inyaka arur, ta paisa shisem.

KSC vice principal, R. Moasangla Jamir-ia college indang otsü tatsüka lemsatet. "Iba anogo ya college tenzükba atema dang masü saka ainba, renlokba aser ajangzükbatem bilemteta amonger" ta lai ashi.

Iba sentong nung "Cracking Competitive Exams" onük nung panel talk ka agi aser iba nung onirji alumna Abeinuo Jasmine

Ashao liasü. Iba sentong nung panelists asem- Shanavas C, Cherakung Zeliang aser Sashiwapang Lanu nungeri parnok taküm otsütem lemsatet.

Tanabuba panel talk ji "Entrepreneurship in the 21st Century" omen nung ajemdaker agi aser iba nung onirji Head of Botany Department Wenyitso Kapfo liasü.

Iba sentong nung panelist temji- business owner & Beauty Barn founder Toinali Kinimi, architect & Zynorique Initiatives co-founder Richard Belho aser Naro Ki founder Watila Longkumer nunger liasü.

OKM-i Mokokchung town nung lenmang yanglushitsür



OKM-i Mokokchung nung lenmang yangshiba mapa inyakdang tangokba noksa.

Mokokchung, September/ Rongjui 14(TYO): Mokokchung nung Rotary Junction nungi Indian Oil tashi lenmang kanga dang mejungi raksar gari senzüsü majungba dang masü saka nisunga tiptema mesenzütetsüsa raksar aliba ngua iba lenmang ya yanglushitsü nungtakerta reprangteta Ongpangkong Kaketshir Mungdang-i tanu nungi tenzüka iba lenmang ya yanglushitsü tenzüko.

Bendang lima nungi osettsüset chiyungtsü aser nungtakba ajak bener arudang jajaba kanga dang tongtipang lenmang aser yimtsüing aikati aoba lenmang lir, iba den külemi iba lenmang yagi shishilembadak(New Market)

ajangdanger aser talisa School aika iba lenmang ajanga senzür, anungji iba lenmang raksaba ajanga mapang talangka kanga dang okronga aruogo.

Ongpangkong Kaketshir Mungdang-i(OKM) iba lenmang ya tekaratiba nung anepalua yanglushitsü nungtakerta reprangteta District Administrtion den timi tongteprateper District Administration den teka amteper OKM-i tongpo apua tanu nungi tarok nung lung inoka ali den meyokteper JCB aser Road Roller amshia iba lenmang yanglushidagi.

Tanu iba lenmang yanglushiba maparen tenzüka mapang nung Mokokchung Deputy Commissioner

Thsuvisie Phoji-i anir Administration nungi officer-tem, Mokokchung Chamber of Commerce & industries nungi President-i anir lenirtem aser Ongpangkong Kaketshir Mungdang Seniors Forum nungi nübo aika aruagi yaritepba den tenla agüja yaritepba asoshi OKM Tir Sb.Tongpangmayang ajanga tepelaba metetdaksü.

OKM Tir-isa anogo Ishika iba lenmang yanglushiba mapa inyakdang iba lenmang anasa shishilembartem, school oli orartem aser nüburtem ajaki ya ajak asoshi OKM-i inyakerta angateta anogo ishikaji asoshi aremzüka atadaksünerta temepishiba olen ka nüburtem dang metetdaksüogo.

MENUNGRA BILEMTETTER



ASÜR R. MAONGKUMLA LONGCHAR
15th September 2023

"Kibuba indang ni ya ashitsü, Pa Kü jenokdak aser kü mitsa, kü Tsüngrem, Shiba dak ni amanger." - Tenüngsang Ken 91:2

Temeim Oja, na iba alima nungi onok toktsür Orr tanü küm ka abensaba anogo nung onoki na menungraseta sarasadema amonger. Tanü na onok den meliaka nü menerem jakden, nü ajemalu taremsük shisatsü aser nü tamang sarasadem teti onok nükla dang arur aser nü temoatsü akhüm nung onok alir. Nabo teti tepela dak asen Teyanglur Kibuba den alitsü ta amanga onok temulung anisüngzüker.

- Temeim Chirnur, Semchir & Kinungertem

Governor Ganesan-i Onam salem abener

Dimapur, September 14, 2024 (TYO): Nagaland Governor La Ganesan-i Onam benjungmong salem metetdaksüogo.

King Mahabali kidangi aruba atema asenoki benjungtepdang asen temulungjang nung temeim aser kidang yimjung agi süngdakjangma ta pai ashi.

Pookalams, Onam Sadya aser sobaliba benjungmong ajanga asenok ka akümba aser sobaliba senmang wazüka ayutsü bilemtetdaksür. Onam ajanga asenoki ajak den lemsateptsü, anepalutsü aser aochitsü ajungmesoangma ta La Ganesan-isa ashi.

Nagaland nung National Lok Adalat ajanga ken o 381 angatettepogo



Dimapur, September 14, 2024 (TYO): Nagaland kübok district headquarters 11 nung National Lok Adalat alidang ken o 1,158 benokba nungi 381 tembanga angaogo.

Iba sentong ya National Legal Services Authority kübok Executive Chairman Justice Manash Ranjan Pathak-i len ania agidang District Judges-i bench 11 ketdangsüa agia liasü.

Lok Adalat ya pre-litigation cases aser pending disputes angatetteptsü nükjidong nung agi. Iba nung bank recoveries, motor accident claims aser public utility disputes dena ken o aika densema liasü.

Tanü ken o 381 angatettepbaji

Rs 4,06,21,512 shi indang liasü aser iba nung damages, fines, loan recoveries aser tanga compensations dena lir.

Dimapur nung civil case 1, pre-litigation cases 134 aser pending cases 11 angatettep aser iba nung settlement amount Rs 22,36,592 liasü.

Mon nung pre-litigation bank recovery cases 8 angatettep aser iba nung Rs. 24,04,910 liasü.

Mokokchung nung bank recovery cases 54 angatettep aser iba nung Rs. 26,74,694 liasü.

Peren nung pre-litigation matters 9 dena ken o 10 angatettep aser iba nung settlement amount Rs 20,24,000 liasü.

Kohima nung Rs. 30,79,970 indang ken o 45 angatettep.

Longleng nung Rs. 2,40,774 alang pre-litigation bank recovery cases 4 angatettep.

Phek nung pre-litigation cases 68 angatettep aser iba nung settlement amount Rs. 28,60,847 liasü.

Kiphire nung Rs. 43,000 alang ken o 3 angatettep.

Wokha nung Rs 4,68,800 alang ken o 26 angatettep.

Tuensang nung Rs. 17,15,221 alang ken o 12 angatettep.

Zunheboto nung pre-litigation bank recovery cases 8 angatettep aser iba nung settlement amount Rs. 21,98,704 liasü.

Dimapur nung mejangjatetba tasü mang ka angu

Dimapur, September 13, 2024 (TYO): September 13, 2024 nü Army Supply Road nung H.H Complex anasa nisung tasü mang ka angu.

Tanü Dimapur Sub-Urban Police station nung iba osang sangoktsü aser police telok ka tonga oa reprangdang tebur (non-local male) tasü mang ka angu.

Police-i tasü mangji District Hospital morgue nung post mortem asütsü bener ao. Tasür kinunger, medemertemi Officer-in-charge. Sub-Urban Police Station, Dimapur (Mobile No. 7085055026) den tongteptsü metetdaksür ta Dy. Commissioner of Police (Crime)/PRO, Dimapur-i ashi.

USR, GPRN/NSCN (U)-i metetdaksür

Dimapur, September 14, 2024 (TYO): September 2024 tetenzülen United Sangtam Region (USR), GPRN/NSCN (U) Region Meeting amendang nisung kari GPRN/NSCN (U) tenüing menüktsüba indang onük lemsatepogo.

United Sangtam Region (USR), GPRN/NSCN (U)-i region nung yimjung aser tiptema alitsü merangaka pei ajangzüksü asoshi bilemer kari GPRN/NSCN (U) tenüing amer United Sangtam administrative Region tasen ka tentettsü meranger ta Regional Administrative Officer (RAO)

Alex Sangtam-i sangdong ka nung ashi.

United Sangtam Region (USR), GPRN/NSCN (U)-i ama mapa meinyakdaksütsü aser kija/teloktemi GPRN/NSCN (U) tenüing mamshitsü metetdaksür. United Sangtam Region nung iba mapa inyakertemi tebilemstü khuret ajak abentsü ta pai ashi.

United Sangtam Region (USR), GPRN/NSCN (U)-i President Gen. (Retd.) MB Neokpao Konyak aser Ato Kilonser Inno Alezo Venuh na lenisüba kübok noktaka lir ta Alex Sangtam-isa ashi.

Khehovi Chophi-i mapa toktsüogo

Dimapur, Rongjui/September 13 (TYO): Asür Vizheto Chophi'er jabaso Ino Khehovi Chophi (Kilonser Law & Justice)-i sangdong ka ajanga pai mapa toktsüba sangdongogo. Mepaitoktetba jurila maparen kar aliba ajanga pai iba mapa toktsüsüsa aküm aser linük tenzüksü atema maangka anguba ya pa taküm nung tetushi rongnung tulutiba asütsü ta ashi. NSCN-ia, pai pa mapa nungi

anentsütsü mepeshia züluba shiti agizükogo aser tarutsü takok nung aotsü imlaja ataba lemsatepogo. Kasa mapang nung NSCN-isa, pai Naga nunger asoshi kechisa inyaktsüogo, item ajak asoshi pa dang kanga pelaba lemsatepogo aser item mapa tajungtem teti bilemtettsü ta MIP (Ministry of Information & Publicity) NSCN/ GPRN-R (Akato)-i sangdong ka ajanga metetdaksü.

Party balala nungi lenirtemi Sitaram Yechury nem akhüm agütsü



September 14, 2024 nü New Delhi nung CPI(M) headquarters nung party balala nungi lenirtemi CPI(M), General Secretary, asür Sitaram Yechury nem akhüm agütsü dang tangokba noksa nung angur.

New Delhi, Rongjui/September 14 (Agencies): Honibarnü Congress parliamentary party chairperson Sonia Gandhi, Kerala Chief Minister Pinarayi Vijayan aser Congress lenir Ajay Maken nung densema party balala nungi lenirtemi Delhi nung aliba CPI(M) party office nung CPI(M) lenir, asür Sitaram Yechury nem tatembangbuba akhüm agütsüogo.

August ita 19 nungi AIIMS, New Delhi nung Yechury treatment agia aruba sülen September 12 nü asüba sülen party balala nungi lenirtemi pa nem akhüm agüja arudar.

Yechury-i India nung yimtenren nung kanga tongtibang shilem agiba den külemi küm 30 dak tali nüburtem tenzüka aruogo.

Congress nungi Sonia Gandhi den P Chidambaram, Jairam Ramesh aser Ajay Maken nungeria Yechury nem tatembangbuba akhüm agütsü.

Rajya Sabha MP, Kabil Sibal-i, "Pa ya medemer tajung ka liasü. Pai Parliament nung tiyongtsüi aita jembidang ajak puadakja liasü. Yimtenren lenir ajaki pei atema tashi aser menden tajung atema dang bilemer saka Sitaram Yechury ama lenirtemibo tangar atema pei taküm agütsü," ta metetdaksü.

Chinese Ambassador to India, Xu Feihong-ia CPI(M) party office-i oa Sitaram Yechury nem tatembangbuba akhüm agüja liasü.

Taoba mapang Nepal Ato

kilonser, Madhav Kumar-ia Sitaram Yechury nem akhüm agütsü. Pa nem tatembangbuba akhüm agütsürtem rongnung NCP Tir, Sharad Pawar-a densema liasü.

Iba sentong nung jembidang DMK MP, Kanimozhi-i, "Ni yagi ozü party tenüng nung aser kü kija sasep nung iba linük nung kanga tongti lenir ka nem akhüm agütsütsü asoshi aru. Pa asüba takoksa ya yimtenren tsütsü nungi dang masü. Pa ya shisashir ka, kaketzüür ka aser tarutsü nung yimten lenirtem asütsüpurtem atema ajungmesor ka liasü," ta metetdaksü.

Honibarnü CPI(M) General Secretary, Yechury nem akhüm agütsürtem rongnung CPI(M) lenirtem aser party nung inyakertema aika liasü

CPI(M) lenir, Hannan Mollah-i, "Pa (Sitaram Yechury) ya onok ajungmesor ka liasü. Onoki timtem balala ajangshiba mapang ajak nung pai onok nungita yari. Linük nung democracy, secularism aser telongjem atema ola tulutiba adoksangji pa liasü," ta ashi.

Taoba mapang Rajasthan Chief Minister, Ashok Gehlot-i, "Sitaram Yechury ya khenyongi balaka liasü aser linük yimtenren nung pa ya balaka liasü. Pa dak aliba shisatsü ajanga party balala nungi lenirtem aika angazük. Tang ama mapang ka nung par kibong nem Tsüngremi tashi agüjang ta sarasademtsür," ta lemsatep.

SP Tir, Akhilesh Yadav-i, "Sitaram Yechury ya linük nung

lenir tajungtibatem rongnung ka liasü. Iba linük nung tangatetba balala tsüngda apu latsütsü atema inyakerji pa liasü. Sitaram Yechury-i pa akumli piyong timtem ajangshi aser pa tangatetba nüburttem den lemsateptsü atema inyak. Sitaram Yechury teti bilemtetsü. Yimtenren nung tajung-tamajung aika ajangshiba lenirtem rongnung pa ka liasü. Iba linüki kanga teintet lenir ka takoksa nguogo," ta ashi.

Aam Aadmi Party lenirtem-Manish Sisodia aser Sanjay Singh natia AKG Bhavan nung Yechury nem akhüm agüja liasü.

Yechury-i pa kinüngtsü, Seema Chishti den par chir ana-Akhila aser Danish na toktsür pilaogo. Pa jabaso tambusang, Ashish Yechury bo 2021 küm coronavirus tashidak agi asü.

Yechury-i mezüng kinüngtsübo Indrani Mazumdar liasü.

Yechury temang mejungi akümba sülen taoba ita (August 19) New Delhi nung aliba All India Institute of Medical Sciences (AIIMS)-i anir oa treatment tagidak liasü.

Pa AIIMS nung aliba Intensive Care Unit (ICU) nung acute respiratory tract infection atema treatment tagidak lia asü.

Sitaram Yechury ya 1952 küm August 12 nü Chennai nung aso aser pa ya India nung yimtenren nung kanga tongti lenir ka liasü. 2015 küm nungi tenzüka pa CPI(M) nung General Secretary inyaka aruogo.

Kibong aseme J&K state raksatsü: PM Modi

New Delhi, September 14 (Agencies): Honibarnü Ato kilonser Narendra Modi-i Congress, National Conference aser PDP party tem aija, Jammu & Kashmir nung yimtenren kibong aseme parnok indang senmangba politics asayaba ajanga state raksatsü, ta aitsü.

Jammu & Kashmir nung assembly election agitsü mapang ana nung lia J&K kübok Doda nung lokti senden ka nung jembidang Modi-i, "Jammu and Kashmir nung taruba assembly election ya kibong asem aser Jammu & Kashmir nung lanurtem tsüngda election asütsü. Kibong kaji Congress nungi, kibong kaji National Conference nungi aser kibong kaji PDP nungi lir. Item kibong aseme Jammu & Kashmir nung nüburttem atema inyakbaji temenen den kasa lir," ta ashi.

"Tang tashi 'Pariwarwad'-i lanurtem tejakleni arutsü memelar, ibayongji 2014 küm sorkar akümba sülen ni Jammu & Kashmir nung lanurtem lenisüba tejakleni bener arutsü atema merang. 2018 küm yangi Panchayat elections agiogo. 2019 küm BDC elections agi aser 2020 küm tang mezüng yangi DDC elections agi. Kechiba item elections agi? Jammu & Kashmir nung democracy agi

grassroots level atongtsü atema agi," ta paisa ashi.

Modi-i, senmangba party tem ajanga yimsüsür tasen intettsü atema temelaba magütsü aser telung nungi state tazüngla kümdaksü, ta ashi.

"Nüchiso anguba sülen bendangertemi mezüng tenük yokbaji Jammu & Kashmir liasü aser senmangba yimsüsüba ajanga iba tepor tajung lima ya telung nungi tazüngla kümdaksü. Senmangba yimtenren ajanga parnok chirnurtem dang ajungkettsü aser lenir tasen adoktsü atema memela," ta paisa metetdaksü.

J&K nung Arla 370 agenba sülen tang mezüng Kashmir nung assembly election agitsü.

Election Commission of India-i ashiba agi, Jammu & Kashmir nung vote agütsütsü temsüa alir lakh 88.06 lir.

Taoba Assembly elections nung People's Democratic Party (PDP)-i menden 28 angu, Bharatiya Janata Party (BJP)-i menden 25, Jammu and Kashmir National Conference (NC)-i menden 15 aser Congress-i menden 12 nung takok ngua liasü.

Jammu and Kashmir nung shilem asem lemsar September 18, 25 aser October 1 anogotem nung election agiba sülen October 8 nü vote azüngtsü.

J&K kübok Kishtwar nung sepai ana khaset



J&K kübok Kishtwar nung kiralongrartem den raradang sepaitem adenshia aliba noksa angur.

New Delhi, September 14 (Agencies): Jammu and Kashmir kübok Kishtwar nung kiralongrartem den raradang junior commissioned officer (JCO) ka densema army ana süogo.

Army aser police senteper Naidgham area nung kiralongrartem mita aoba mapang nung Naidgham yim anasa Pinnae Dugadda arem nung sepaitem aser kiralongrartem tsüngda rara tenzüki. Iba rara nungji army pezü yiru saka JCO Naib Subedar Vipin Kumar aser Sepoy Arvind Singh nabo meküzmükteti asü; ka grenade

apokba lendong nung yiru aser ka tekolak nung injang agi khashia asü, ta army temi metetdaksü.

Army temi sangdong ka ajanga, "GOC (General Officer Commanding) White Knight Corps aser sepaitem ajaki taküm tenla agütsür tasütait ana nem akhüm agütsür aser parnok kibongtem den mangyim jashi lemsateper," ta metetdaksü.

Anogo ana tejaklen Udampur kübok Basantgarh district nung army temi Jaish-e-Mohammad (JeM) kiralongrar telok den sendaktepa aliba Pakistan nung kiralongrar ana khaseta liasü.



Sept. 14, 2024 : BJP MP Ravi Shankar Prasad-i Patna nung school tanur nem school bag lema agütsüba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, SEPTEMBER (RONGJUI) 15, 2024

Putepdaksüba jenjang

Tsüngremi alima nung alitsü nisung yanglu aser longsu-longsua jangratema alitsü asoshi soyapokdaksü. Ajisüaka, item nisungtem jagi Tsüngremi ashiba manga temenen menaba ajanga Tsüngrem o nisungtem na tsüngda meputep aküm. Aji oda, nisungtem temenen agi Tsüngrem nungi piladaksü aser parnoki parnok yanglusang amadok nungji, Tsüngrem kanga jashi liasü. Iba ama tia ka nung alijak nungi ano meimchirtem samatsü lia, Laishibai ashir, " Tsüngremi alima kanga meim nung, Pai pa ajaso chir ka dang aliba meimchir temenen pongitsü asoshi angati agütsü, anungji shirnoki Pa dak amangdir kodanga mesamatsü saka teti taküm angutsü." Tetezü, Tsüngrem o meimchirtem na tsüngda meputepteti aliba Yisu Khrista alimai aruba ajanga puteptshidaksü. Alima nung meimchir taküm yimya, achiajem aser sobaliba ajunga tesempatsüka liasü. Aji oda, meimchirtemi Tsüngremi aginütsüsa kecha meinyak, ajisüaka Yisu Khrista nisung kümer alimai aru aser timtema kangki nung Pa taküm bendanga agütsüba ajanga meimchirtem temenen taidok angu. Tetezü meputepi aliba puteptdaksütsü asoshi inyakba maparen nung nisung kar mapang, rongsen aser taküm bendanga agütsütsü nungdaker. Meputepi aliba puteptüba jenjang (price)-ji tasak. Odangbo meputeptettsü. Puteptsü atema kari aremzüksüla, takoksa, timtem aser maksü aremzüksüla. Aji oda, meputepi aliba puteptsü atema taidok agütsüteptsü nungdak adoker. Item timtem khuret ajakji Yisu Khristai aben nungji asenokbo Tsüngrem den ano tesendaktep tajungba yanglutsüogo. Yisu Khrista tenüng maneni sangdi. Joko, asenok dang Yisu Khristai inyaktsü ashiba tongtibang mapa kaji, " ni kechi koma nenok meim, yamaji nenok rongnunga kati ka den meimtepang," ta ashiba o ya asütsü. Aji oda, asenok ya Yisu Khristai tenyaba mapa inyakertem lir. Asenok ya Tsüngremi osangbenertem aser yimjung yanglurtem asütsüla. Asenok tai temenen ajanga Tsüngrem den dang masü saka tangar dena meputeptetter. Iba jagi tanü asen lima ya meputep mesüra tsükchitep agi sünga lir. Asenok temenen ajanga kibong balalular, medemer aser kinüngertem rongnung meputep adoker aser arogo dena raksar. Temeneni asenok rongnung tenük merem aser mulung melemtep adokdaksür. Item meputeptetba temenen ajak madak takok angutsübaaji asenoki tama Tsüngrem den yimjung yanglu nung dang aser Pa den putepa ali nung dang akoktsü. Asenok mulung nungbo tangar sempar saka tebang agibo puteptsü jembir aser asenoki tangar nem taidok magütsütetter saka asenoki yimjung indang jembia senzür ta süra, ibajibo anemsü agi yimjung bushiba mapa ka asütsü. Iba jagi Tsüngrem mepeladaksütsü aser nisungtem puteptdaksütsü makoktsü. Lashiba ajanga Tsüngremi asenok nem kanga inyakdaksünübaji tangar dang temeim sayutsüba ya lir. Tetezü, asenok tangar den putepa alitsü aser tangar o tangar na ta putepa alitsü merangdaksütsü. Yohan 13:35 nung ashir, na Yisu dak amanger aser pa nütsünga ta tangari metettsübaaji nai tangar dang temeim mapa inyakba ajanga metettsü. Tsüngremi koda meim yamaji asenokia tangar dang meimtsübaaji dang Yisuia aginer. Temeim agi dang taiadoker aser temeim agidang puteptdaksür. Tangbo joko Tsüngremi asenok nem tangar puteptdaksüba mapa inyaktsü nunglokja lir. (2 Kor.5:18). Anungji, asenokbo meputep adokdaksür masü puteptdaksürtem asütsüla.

OLEMSABANG

YI, YIJEMER, YIYOKER, YIOZÜNG

~ T. Meren Paul, Lower PR Hill, Kohima

(Yashi adok nungi...)

Nagaland nung joko Star Hotel eshikabo lapoka lir aser edem tesem nungji yi tajung angutsü, aser ano takum December tashi nungbo Kohima City Center nung Star Hotel lapoktsü aser yangji yi angutsü. Yi tajungji hotel tajungdem nungji angutsü aser yi tamajungji kishi kinük kira nung angutsü. NLTP Acts 1998 aliba ajanga yi mangur masü angur aser anosa angutsü. NLTP Acts, 1989 ji tanaben semdangyonga mesemdangyonga yi ji maneni angutsü kechiyong Government tejangraba nung yi kenyongi nokdangtsü tebilemba mali aser Excise Department dak NLTP Acts, 1989 ji jangjala amshitetsü parnok ket nung nütsüng aser rongsen tashi peria mali ta ajiteter. NLTP Act, 1989 ya shidak amshibademji, kong, shirisa yi abentsü, ayoktsü, ayutsü, yanglutsü aser ajemtsü ajakji permit agütsür shidak inyakdaki. Minyaktetba aser menokdangtetba tamakok mapa demji permit maka sürnung yi belena ayokba, yi tamajung yanglua ayokba, yi ajemer menokdangtetba, kechiyong ozüng jagi nisung shinga yi jemer lokdi senzüdaki (public place) maotsüla ta zükdanga lir, süra edem tamakokji kodaser koktetsü?

Küm 35 tesuiba mapang koba yayim aser sentong agi yi nokdangba mapa inyak tanübo ketsa yayim nungjisa rahloka amdaker makazüi mapang den apet shisa lentong yayim tasen kar bushidanga inyakdangtsüla. Taoba mapang yi (substance) dak rangloker inyakogo. Yi bottle tepsaa endokogo, yi dokan shibangtsüogo, yi muloba tesem (distillery) shibangtsüogo, lenmang lenti nung gate yanglur kari tesünüba ajak sota mitogo, saka yi tu mesamadaksütet aser tanü tashi maneni yi tajemtsü angur aser yamaji tajemer ah lir. Süra koba tashi takok nguogo aser koba tashi tamakok nguogo repringdangtsüla. Arungma, ranglokdong ya ken melenshitsüla aser tangatetba asetshila masü noh?. Yi ranglokdong (substance) nungjagi asetshia Yijemer ranglokdong (soul winning) lenji tejak ken meyiptsüla. Yi bottle agi nisung bushir masü nisungi yi bushir. Yi bottle jagi yijemsangji memetet aser par ki kong lir mangu saka yijemsang jagi yi bottle kobala ajemtsü aser ki koba nung angutsüar meteta lir. Yi ayokba mayokba nükenbulu mapang endokba dang nungibo yijemer ka melenshidaksütsü mapang endokba tajangzük tuluba asutsü. Yi jemer shinga melira yi ayokera malitsü. Saka tajemer ali tashi tayokerji alitsü, demand aser supply ji universal theory anaji mepilatsü. Ni yi majemer aser ozü chirdem danga yi majemtsü sayutsünger aser parnokia yi majemer. Yi jemerdem danga aiben yi adoktsü ajungshir aser yijemtsübo sen magutsür. Laishiba tsütsü nungi dang masü lokdi libaren tsütsü nungiah maneni yijemer den sensaksema alitsü aser sarasademtsütsü ibaji kü tangatetba aser maneni inyaktsü.

NLTP Act, 1989 inyakyim komama amshitsü Rules yanglua lir. NBCC aser ABAM amah Mungdangdem nung iba NLTP Act, 1989 aser Rules tejangja metettsü asoshi Mungdang aser Arogo nung lenirdem ajaki Act aser Rules ji züngdang asü mezüngdang? Seminar kowiben agia olemtepa tatsü tahlang asadangdang? Koba nungsa takok ngua lir aser koba nungsa tamakok alua lir ta kowiben lephsia repringshir? Tesüiba küm 35 odang züdazüyima doktsür tang Govt-i iba ozüng ya tanaben ken semdangdi ta asüdang asenoka ajungbena aoksaer roka asodi ma? Christian population nung 50% Roman Catholic aser tanüngba 50% Protestant aser yangnungjagi jakzükba asenok telok dem lir. Christianity ya küm nung 2.3% renloker saka Islam bo küm nung 2.9% renloker. Asenok yi ayoktsü mayoktsü bangsemtepa kazüdang tanela samaba anir arua kümzüksü mapa sendokra Tsüngremi ibajiang mepelatsü ta nibo pilemer.

Asenoki tang yi jemer atema araa atua jembiba ya Yijemer aser Holy Spirit indang masü saka Yijemer aser Alcohol Spirit indang dang jembir. Nagaland ya Christian State anungji Dry State asütsüla ta tangar matüungdang nüma tanga sayunüba ji spiritual mapa masü aser Tsüngremi mulungba masütsü südi. Yi samadaksütsü tesüiba küm 35 merangdangogo saka yi timba timba dang angur aser ano maneni angutsü. Joko mera tasen ka yi masü yijemer samadaksütsü merangtsüla. Yi jemer nem Alcohol Spirit melena Holy Spirit jemdaksütsüamangbapur aser Arogo tashi ajak agi merangtsüla. Joko yi mesamadaksüteterji meyipar yijemer samadaksüdi arung. Kodang yijemer ajak samadokdir yi ayoker shinga malitsü aser yi ji pasasa samatsü. Küm 35 mapa matenba agi tamang tasü süiogo anungji tang mera tasen ka tamang mapa merangdangdi ni ta ni kü shisa tatsü agi atongba lemsateper.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Pope Francis-i linük pezü semdangba sülen Rome-i meyipa ogo



September 13, 2024 nü Singapore nung Pope Francis-i kanga tantsür-tamburtem den jembidang tangokba noksa nung angur.

September 14, 2024: Pope Francis-i anogo 12 tashi Indonesia, Papua New Guinea, East Timor aser Singapore linüktem semdangbasülen Hokolbarnü Rome-i meyipa ogo.

Hokolbar nikongdang Singapore Airlines tayimtsü ka nung Pope Francis den pa meina senzürtem Singapore nungi apusoba sülen aonung Rome tonga ao.

Arrshi küm 87, Francis temang mejungi dang liaka pai Indonesia, Papua New Guinea, East Timor aser Singapore linüktem nung sentong 40 dak tema nung shilem agia denogo.

September 4 nü Indonesia Tir, Joko Widodo lia Pope Francis-i linük nung yimsü balala amangertem tsüngda taremkütket aser yimjung nung alitsü tayongzükba agüja liasü.

Khristan nütsümg million 8.9 aliba Indonesia linük nung Pope Francis-i tamangba yimsü balala

amangertem tsüngda tesendaktep tajungba akümtsü atema ajungshia liasü.

Indonesia nungsa Pope Francis aser Jakarta nung aliba Istiqlal Mosque nung Imam tongti nati yimsü dak sendakba nung raraba anentsü aser alima tzü-mopung kümzüksü atema tezüngzüktep ka agiogo.

Papua New Guinea nung arem ka nung aliba nisungtem atemabo Pope-i mozü, süoshi aser tanurtem atema kazütsü densema teyari oset seret meyrjang aika agütsü.

East Timor nung Pope Francis-i leniba tekülem sentong nung linük nung aliba nütsümg tesadang shi-nisung 600,000 aden.

East Timor nung nütsümg shilem 96 bo Catholic Khristantem lir, aser tawa Pope-i semdangba linüktem rongnung

Khristan nütsümg teimba aliba linükji East Timor dang liasü.

East Timor ya alima nung kanga sensaker linüktem rongnung densema lir. East Timor nung nütsümg shilem 42 bo below poverty line (BPL) kibongtem lir, anungji Pope Francis-i rongsenkettzüng aser loktiliba tebilemtsü onüktem-a jembia liasü.

Pope Francis ya joko mapang talangka temokok aser teberem ayang-ashi agi timtema arudar, anungji pa ainlen senzüba mapang piyong pai wheelchair amshia liasü.

Singapore nung pai sorkar dang bendanglen nungi arua mapa inyakterem nem mapa inyakba taa shidak agüjang, ta ayongzükba liasü.

Singapore nung nütsümg million 5.92 lir saka Catholic Khristantembo 210,000 dang lir.

Singapore nung aliba national sports stadium nung Pope Francis leniba nung tekülem sentong ka agi, aser iba sentong nungji nisung 50,000 shi aden.



Mokokchung Town Baptist Arogo nung Youth Department kübok Crossroad pur telongjem sentong ka agiogo. Iba sentong nung Ao Riju nung Publication Head Wb. I. Temjen Tzudir ajanga "Nüngjakoja, Jayajako aser Kibalenburen" ta asüba onük nung jembia aser Asso. Pastor, MTBA Rev. Sentimeren ajanga "Tsüngremer Lenmang Shimba" ta asüba onük nung jembia lanurtem tetsü oshi tsütsülen aser tanela tsütsülen kanga dang temoatsü ngua agia liasü.

ANOGO ABEN TSÜNGREM DEN

TEMENEN BUSHIA SARASADEMBA

Onoki tai menaogo aser aibelenogo, aser mejungi inyakogo, aser tashi manga; Oda nü özüng nungi aser ne yimsü özüng nungi meyipadokogo. -Daniel 9:5

Tsüngremi mezümg yangluba Adam aser Eva nungi tenzükba meimchir tashi mait aser shisa makaba ajanga Tsüngremi melaba özüng nung melitetba agi timtem, khuret, maksü aser tesama ajurua aruba tatalokba aika lai O nung shia angur. Aseni temenen benshi nung asen dangisa iba yari temerenshi arur. Aji saka meimchir mulungjangsa tamajungtiba asünung tejenpulen lenmang aika bushia Tsüngremi mangur aser memetetts? ama bilema sangrasangji tasa balala bener liteper. Iba ajanga pei sasa pei temenen mangur aser mebushir.

Iba Lai O nung Daniel shiba Babilon nunger küpok tepuoker ka ama liasü pai Yerimia ainkari shinba ama Babilon kübok alar ama küm neter (70) tashi alitsüba ya tanga kecha agi masü ozü tetsü-tebu, ozü tsüraburtem aser onoki onok dang meima taochi agi sünga aliba ozü Tsüngrem nungi pila-a pei sünütsü süa pei sasa alir ama Pa jashidaksüba temenen ta-a ajanga lir ta Daniel-i shishia bilemtet, pai taoba mapang aibelenba temenen Tsüngrem tsüngdang temulungjang taroktiba agi bushia sarasadem. Tanüa asen tetsü-tebu, tsürabur aser aseni menaba temenentem bushia sarasademra Tsüngremi iba talenba salaja temoatsü agütsütsü mulunga lir.

Christian college ka nung Ganesh süngyanglu ayutsü takhangba agütsü

September 14, 2024: Madhya Pradesh state kübok Vidisha nung aliba Khristan college- St. Mary's Post Graduate College nung azünger kar densema Hindu nunger telok ka college gate nung adenshiba sülen anogo 10 nü tashi Ganesh Chaturthi benjung mapang college nungji Hindu nunger Ganesh süngyanglu ayutsü takhangba agüja liasü.

Ganesh Chaturthi ya Hindu nunger benjung ka lir aser iba benjung ya Ganesha tsüngrem asoba nungtem nung amonger. Iba benjung mapang nung tamangertemi pei kidang aser lokti aliba tesemtem nung ajongli agi yangluba Ganesha süngyanglu amshia külemer.

Iba benjung mapang nungsa prasad (süngyanglu nem tenla agütsüba chiyungtsü) lema agütsür. Iba benjung tembanga Ganesha süngyangluji lenmang nung yimdong süa bener senzüba sülen ayong nung remtsür.

Ganesh Chaturthi benjung atongtsü hopta ka jelia St. Mary's P.G. College nung azünger kati college kettangsertem ajurua college campus telung nung Ganesha süngyanglu ka ayutsü asüngdang, ajisüaka college kettangsertemi ibaji tamakoktsü, ta shia temelaba magütsü.

Osangbener den jembidang Sagar nung aliba Arogotem nung Education Secretary putir, Sabu Puthenpurackal-i, "Ganesh Chaturthi benjung ya anogo ter nü benjung ka lir aser aonung-anügdang ajak amonger. Komaser iba ama sentongji college campus ka telung nung melatsü, kechiyong college working hours lateta lir aser nikongdang 4:00 ako nung college gate shibanger. College campus telung nung Ganesh

süngyanglu yura anügdang-aonung kecha tebandang makai nisungtemi semdangtsüsa akümtsü. Süra kaketshirtem anogo ter tashi koma class agütsü," ta metetdaksü.

"Ajisüaka college kettangsertemi kaketshirtem dang Ganesh süngyangluji college kima tongti gate anasa ayutsübo melaa liasü. Onoki senotsü agia yaritsü ta ashi, kechiyong anogo ter nü benjung mapang nung parnoki sen aika indoktsüsa akümtsü. Ajisüaka kaketshirtemi college kima süngküm adener süngyanglu ayutsüji memelung," ta Puthenpurackal-i metetdaksü.

Sorkar kettangsertemia Khristan College kettangsertem telemtebaji pusemba dang masü saka tensa azüoktsü atema police security agüja liasü.

September 7 anepdang ABVP aser Sanatan Shri Hindu Utsav Samiti züngsem 50-60 shi college gate anasa adenshir college kettangsertem anema yimyim ayima liasü.

Khristan putir, Puthenpurackal-isa, "Parnok rongnung onok college nungibo kaketshir 5-6 shi dang liasü. Tanünga nisung ajakji tangar liasü," ta metetdaksü.

2009-2015 kümtem nung St. Mary's college nung Director inyaksang, Puthenpurackal-i, taoba mapangtem nungbo Ganesh Chaturthi mesüra tanga benjung balala mapang nung kaketshirtemi college nung süngyanglu ayutsü takhangba magütsü, ajisüaka iba ama takhangba ya tang mezümg agütsür, ta metetdaksü.

Khristan college- St. Mary's Post Graduate College ya Vidisha district nung private colleges tejentibatem rongnung ka lir. Iba college ya kanga nüngtugu college ka lir.

**AO OSHI ANGAZÜKDAK:
TANÜ ANGAZÜKTSÜBA OJANG**



Tanbo

(adv) tang yabo (for this time)

* Tanbo asenok ajak tenüng nung ni odi.

Taneja

(n) shirang aneptsü atema tanela ajai aoba (spiritual ritual to call back soul)

* Limapur shirang dang arasentsür nem taneja mapa inyakdaksü.

OLONG PAITEP # 6924

15x15 crossword grid with numbers 1-16 indicating starting positions.

TIPILEN

- 1. Ojembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzüik asendak - 5
14. Tsüngpang tema aliba - 5
15. Ken atenba yimya - 5
16. Asangur - 8

LANGTSÜNGLEN

- 1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjidong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 6923 TELANGZÜBA

TIPILEN :

- 2. Benja, 4. Tamet, 5. Wabong,
6. Benden, 10. Khuret, 12. Temeim,
14. Semtu, 15. Tenya.

LANGTSÜNGLEN :

- 1. Amo, 3. Jana, 4. Tembar,
5. Wangküm, 7. Dokan, 8. Khu,
9. Petinu, 11. Bere, 13. Ama.

KHEN SHISADANGDI

LIM AROGOTEM ATEMA TONGTIPANG TEMETETSÜ

- 1. Tanü putu nung, tershilem tenla karibo tenüng mezülü agütsür... Sürabangla iba tershilem tenlaji Recept amshir asü mamshir...? Ibaji adok nunga adoktsür asü madoktsür...? Shitakba agibo tenüng mezülü kwika arudir "Tenüng mali" (Anonymous) A, B, C, D...ta sur Recept katitsüla aser adok nunga adoktsüla... Iba amaji meinyaki lira...iba senjibo mopong nung dang sama-a alitsü akok !!!
2. Arogo küm tatem Annual General meeting nung Ministry ajunga atema küm piyong asoshi teinyaktsü mapa den sen Budget approved asür. Aji oda, iba Budget-ji küm tetenzükdangyongi sen lakh/crore ajungaji agütsür (Full payment) asü...??? Mesüra küm tsüngda nung, nungdakba mapang shitak-shitak nung nungdakba yari (Partly -payment) agütsür...??? Shitakba-bo mapa inyaksü mapang shitak nungji mapa yari (Partly) Deacon Board-i sanction approve sur...DDO-i sanction order zülur nungdak apir senji agütsütsüla. Aji oda, sen lir ta ser küm tetenzükdangyongi Budget ajungaji agüja-dokra...Ibajibo aibelentsü lenmang sadema lapoka yutsür masü naa...???
3. Arogo senpong/sen ayudak (Safe Box) Lock & Key asebo amshitsüla. Tatishitsü...DDO-i mezüngbuba Lock-ji lapoktsüla, Deacon kati tanabuba Lock-ji lapoktsü aser Cashier-i tasembuba sen ayudak sungden Lock-ji lapoktsüla. Aji oda, nisung asem rongnung ka danga medeni sen ayudak (Safe Box)-ji melapoktetsüla.... Ajisuaka, nisung ka kijai lapoka amshitetsüsa toktsüra...ajibo aibelenang ta sadem-sadema yutsür masü no...!!!!???

Tashitemeter putu asünung arogo ajungai kanga junga inyakdar...Saka ano talila rajema bilemteta inyaksü asoshi... kü shisatsü tangatetba yari ajungshir..... Aser iba ya züluba ajanga nisung shinga temulong meyrutsü mepeshir.

- L. Kika Pongener.

Centre-i Manipur indang report benoktsü anogo atsülangtsü

Guwahati, Rongjui/ September 14 (Agencies): Manipur nung azütokshi lendong bushisüngdangba Commission of Inquiry nem centre sorkari parnok indang report benoktsü asoshi November 20 nü tashi mapang atsülangtsüogo.

Taoba Gauhati High Court Chief Justice Ajai Lamba-i anir iba committee ya 2023 küm June 3 nü tentetsü. Iba committee ya Manipur nung azütokshi lendong atalokba tera aser iba ajanga takoksa tulu bener arutsüba indang

bushisüngdangtsü atema tentetja liasü. Iba azütokshi lendong nung 2023 küm May 3 nü nungi tenzüka tang tashi nung nisung 220 taküm samaogo.

Commission nem mezüngbo ita trok mapang atakzükja liasü, ajisüaka tang osang ka ajanga mapang ya November 20 nü tashi atsülangtsüba sangdongogo.

Iba telok yagi, azütokshi lendong matalok tsüngda kechisa ataloka aru iba indang b u s h i s ü n g d a n g t s ü , ketdangsurtemi mapa shitak

minyaka ta ashiba asadangtsü aser azütokshi lendong nokdangtsü atema jenjang agibatam asadangtsü.

Commission-isa, kija aser lokti tentet balalai tashishiba balala benokba asadangtsü.

Manipur nung azütokshi lendong ya 2023 küm May 3 nü tenzüik aser tang tashi nung iba lendong nung nisung taküm aika samaba den nisung aika yiruogo aser kiojen aika raksaogo. Iba ajanga state sorkari Commissions of Inquiry Act, 1952 dak ajemdaker judicial inquiry ka benoktsü shidang liasü.

Myanmar den arrtsü nung atsü atsütsü benokba CYLA-i agizük



Aizawl, Rongjui/September 14 (Agencies): Mizoram sorkar aser state lokti tentet arrtsü nung atsü atsütsü benokba anema nokdaka aruba mapang ka nung Central Young Lai Association (CYLA)-ibo Centre-i iba international arrtsü atsütsü asoshi benokba agizükogo, ta CYLA lenir kati ashi.

Ministry of External Affairs (MEA) border management division (Myanmar aser Bangladesh in charge) joint secretary B. Shyam den Brehostibarnü Aizawl nung senden ka amenba mapang, Mizoram aser Myanmar na arrtsü km 510 aliba atsü agi atsübangtsü atema Centre-i benokba ya parnokibo pusemba metetdaksüogo, ta CYLA general secretary Joseph Lalhmingthanga Chinzah-i ashi.

Pai ashiba agi, par lokti tenteti atsü atsütsü asoshi benokba pusemogo, kechiyong iba ajanga ozüing alema state-i nüburtem senoka aitba

nokdangtsü aser iba den kidanger linük nungi shibelenertem inyakyim azüoktettsü aser iba ajanga Mizoram nung ozüing alema inyaksangshiba inyakyim tajemba akümtsü.

"Ozüing alema bendanger state-i aitba aser temesepba mozü aser tenokdangba balala agütsür aliba osettem aitba nokdangtsü asoshi arrtsü nung atsü atsütsüba dak alaka tanga lenmang kecha mali," ta Joseph-i ashi.

Paisa, par teloki arrtsü nung atsü atsütsü asoshi pusemer, kechiyong temsüa alirtembo immigration checkpoint tem ajanga Mizoram-i aittetsü mesüra Myanmar-ia otetsü, ta ashi.

Maneni pai ashiba agi, parnokibo temesepba mozü aser tanga tenokdangba osettem kidanger linük nungi shibelen arutsü atema tsüba bilemba dang masü saka atsü ya atsübanga meyura Mizoram ya nisung shibelenba lenmang ka akümtsü akok ta tsüba bilemer.

CYLA lenirtemi joint secretary dang arrtsü nung atsü takaratiba nung atsütsü mepeshi, kechiyong arrtsü nung tensa ya tamajungba küma aoe, ta pai ashi.

Maneni CYLA-i, Centre dang immigration checkpoint tem amenoktsü aser Zochachhuah mesüra Zorinpui nung shishilemba dak amenoktsü atema takaratiba nung jenjang agitsü mepeshia metetdaksüogo, ta Joseph-i ashi.

Mizoram nung Lawngtlai, Champhai, Siaha, Serchhip, Hnahthial aser Saitual ta district trok Myanmar kübok Chin state den arrtsü nung lir aser Chin nunger aser Mizo nungertem tesendaktep lir.

State home department-i ashiba agi, tang Mizoram kübok tesem balala nung Myanmar nunger tanur 12,784 densema nisung 33,756 jenoka lir.

2021 küm February ita Myanmar nung military-i sorkar atsüngtokba sülen Myanmar nunger refugee tem Mizoram nung jenoka arudar.

Mizoram: Police-i gari aliba ken o jangjashitsü

Aizawl, Rongjui/September 23 (Agencies): Opposition Congress party-i, Chief Minister-i pa jurila amshitsü atema Mahindra Thar asem ali ta ashiba ya shitak masü, ta Mizoram Police-i sangdong ka ajanga metetdaksüogo.

Congress-i, gari ya sen lakh 51 agi ali ta shia nüburtem rongsen lalushipongba atema sorkar aija liasü.

Iba dak sendakba nung police-i sangdong ka ajanga ashiba agi, Thar asem ya CM security atema Mizoram Police-i alizükba lir aser iba ya ashiba ama CM jurila amshitsü atema aliba masü.

Kasa sangdong ajanga ashiba agi, India sorkar table of precedence inyakyim nung chief minister tem ya jenjang tenetbuba nung lir aser parnok nem Z+ security cover agütsür.

Chief minister indang convoy ya pilot gari anati anir aser iba sülen escort motors aser Tail cars tem anidaker, ta police-isa shisem.

CM indang convoy nung amshiba garitem ya pa kübok malir saka security dak sendakba ken o balala atema police department-i agütsür.

Maneni department-i ashiba agi, yimya agi Maruti Suzuki

indang Gypsy gari ya pilot aser tail car ama amshir aser escort motor ama Mahindra Bolero amshir.

Ajisüaka tang CM convoy nung amshiba garitem ya kanga tejen akümba dang masü saka tawa aseben tashi raksaba ajanga timtem adokogo, ta police-isa metetdaksü.

Item ken o tem dak alia ano Gypsy model tem ya joko company-i meyanglur, ta department-i metetdaksü.

Anungji CM security escort atema police department-i Mahindra Thar SUVs asem alitsüsa aküm ta kasa sangdong ajanga metetdaksü.

Myanmar military tekolakbai bendanger teyari meshi



Chief Senior General Min Aung Hlaing

Yangon, Rongjui/September 14 (Agencies): Myanmar indang military tekolakbai kanga bulula minyakba mapa ka inyaka bendanger teyari meshiogo, ta state media-i sangdong ka ajanga metetdaksü.

Linük nung tzümetsüing tesashi aruba ajanga nüburtem meyirejang aika pei talidak ki toktsür jenshia orr aliba mapang ka nung tang military tekolakbai linük balala dang teyari meshiogo.

Linük nung civil war adoker küm asemubaba nüburtem kanga timtemtepba aruba mapang ka nung tang ano tzümetsüing agi linük kanga mejungi kongshiba ajanga timtem tekangshi tali bendenloksüogo.

Typhoon Yagi ajanga tzunglu tesashi bener arutsüba sülen anentsüh aser tzümetsüing agi Myanmar kanga mejungi kongshia liasü. Yagi yipru ya taküm Asia kongshiba yipru rongnung tesashitaba ka lir aser iba yipru yagi nisung 33 tepsetogo, ta sorkari ashiba den nisung 235,000 dak tema pei talidak ki toktsür jena aotsüsa kümogo.

"Lendong agi kongshir alirtem nem teyari agütsütsü atema sorkar keddangsurtemi bendanger linüktem den tongteprateptsüla," ta army chief Senior General Min Aung Hlaing-i ashiba state meyong Global New Light of Myanmar newspaper sangdong ka ajanga

Honibarnü metetdaksü.

"Tekümzükba maparen inyaka teyari balala takokba tashi takaratiba nung agütsütsü nüngdaker," ta pai tekümzükba aser teyari agütsüba maparen balala asadangba mapang ashi.

Myanmar indang military-i taoba mapangbo bendangertemi humanitarian teyari agütsüba magizük mesüra nokdang aruogo.

Myanmar Now independent news publication sangdong ka ajanga Yagi yipru lendong nung asür nisung 66 ajungba sangdongogo. Iba yipru ajanga Vietnam, Thailand, Laos aser Philippines nung nisung 300 shi tepsetogo.

Myanmar nung ki karbo tzi agi metsüingbanger item kitem nung alirtem, tetsür aser tanur densema kilem nung jenoker aliba tekümzükertemi rong amshia kümzükba social media nung noksa balala ajanga nguogo.

Military otongdar kati ashiba agi, linük nung tesem kar denbo tongtepratep mesüet kümogo aser Mandalay nung hon atuba tesem ka nung anentsüh agi nisung aika anenbanger lir ta osang angazükba bushisüingdangdar.

Tang tashi nung nisung 3,600 bo kümzükogo, ta sorkar sangdong ka ajanga metetdaksü.

Linük yimtiba Naypyidaw nungi ghonda ka shi pilar Taungoo tesem nung nüburtemi rong yanglua Buddhist pagoda ka meketa senzüba nguogo.

Kasa mapang nung tekümzükertemi speedboat ka amshia electricity lines aser süngtong kongsangtem merekteta oa liasü.

2021 küm February ita military-i sorkar atsüingba sülen Myanmar nung mepetmesü tulu adoker lir aser azütokshi lendong agi linük nung tesem timba ka kongshir lir.

Kin balala telungpurtem aser telungpur telok tasentemi

military anema nokdak tenzüker tesem balala nung rara arudar. Kasa mapang nung linük rongsenketzung jenjang kanga mejungi kümer lia ano tang tzümetsüing agi kongshiba ajanga timtem tekangshi tali kümduksüogo.

2021 küm February ita sülen nisung million asem dak tema pei talidak ki toktsür jenshiaogo.

Myanmar nung nütsüingyongsük million 55 lir aser item rongnungi asemübo humanitarian teyari nüngdaka lir, ajisüaka International Committee of the Red Cross amala aid agencies tem security dak sendakba nung tetsükdaksü aliba ajanga tesem aika nung inyaksangshi mesüteter.

Taoba küm Mocha yipru agi linük anüolen kongshiba sülen nisung million ka shi timtem nung aliba ngua teyari agütsütsü asoshi teyari agütsüba lokti balalai merangdang, ajisüaka military sorkari parnok nem senzusenpongtsü atema temelaba magütsüi liasü. Iba telemtetba agiba ya United Nations-i aija liasü.

Myanmar nung military-i sorkar atsüingtokba sülen nüburtemi iba anema nokdak tenzük, ajisüaka military-i tashiyim amshia parnok anema nokdakertem azüok tenzükba sülen nisung noklang aika taküm samaogo, aika yiruogo aser civilian lenir Aung San Suu Kyi densema nisung aika tepuokdaki yokogo.

Iba ajanga linük nung telungpurtemi asendenshir military amak tenzük aser parnok-i tesem aika nung sorkar tamendakdak atsüingtoka azüoka arudar. Kasa mapang nung military-i anüing ajanga item telungpurtem amakba mapang nüburtemdaka kanga mejungi kongshia arudar aser aika pei talidak ki toktsür jenshia or lir.

South Sudan nung election küm ana agi atsülangogo

Juba, Rongjui/September 14 (Agencies): South Sudan sorkari sangdong ka ajanga linük nung election 2026 küm December ita agitsü atema telemtetba agiba sangdongogo. Election atema junga renema maliba ajanga election atsülangtsüsa akümer ta kasa sangdong ajanga metetdaksü.

Tang agi tanabenbuba linük election agitsüba anogo melenshiogo aser transitional period ka koba 2020 küm February ita tenzüka liasü iba ya ano atsülanga odar.

Tir Salva Kiir aser pa indang deputy, Riek Machar nati 2018 küm tenanzüktepba ka yangluba sülen küm pongu tashi linük nung civil war adoker aliba tembanga liasü. Iba rara nung nisung 400,000 shi asü aser iba ajanga ayawara tenzükdakja liasü aser refugee mepetmesü tulu ka adoka liasü.

"Tir Salva Kiir Mayardit lenisüba nung presidency-i, linük nung tang tatentep mapang ano

küm ana agi atsülangba aser election koba 2024 küm December ita agitsü liasü, iba election agitsüba anogo atsülangba sangdongogo," ta Kiir indang office sangdong ka ajanga metetdaksü.

Sorkari ashiba agi, census, amala inyakyim tembanga inyaksü iba den linük temzung ozüing tembanga renemtsü aser political party tem züingoksemtsü atema mapang talila nüngdaker, ta national security dak sendakba nung presidential adviser, Tut Gatluak-i ashi

Cabinet Affairs Minister Martin Elia Lomuro-i ashiba agi, electoral institution anaprongla aser security sector nungeri tetuyuba agütsüba sülen election agitsüba anogo melenshia liasü.

"Election magi tsüingda maparen tembanga minyakaki aliba kar inyaksü asoshi mapang talila nüngdaker," ta Kiir indang office sangdong ajanga metetdaksü.

Linük tang rongsenketzung nung mepetmesü adoker aliba ka lir aser iba ajanga civil servant tem küm ka shi itasen mongui arudar. Kidanger Sudan nung civil war adoker aliba ajanga pipeline ka raksatokba agi totzü export asüba dak kongshiba sülen tang iba timtem ya ajangshia arudar.

Independent political analyst Andrea Mach Mabior-i ashiba agi, inyakyim ajak junga merenemi election agira rongsen lalushipongba dang asütsü.

Security act tasen ka koba August ita ozüing kümogo, iba ozüing kübok warrant medeni nisung ka sota yutettsü. Iba ozüing ya human rights teloktemi ashishioogo aser ashiba agi iba ajanga election magi tsüingda lokti tetsüba agi süngdaksütsü.

South Sudan nung tang nisung million 9 humanitarian teyari nüngdaka lir, ta United Nations-i ashi, koba linük nütsüingyongsük shilem 73 shi asütsü.

DIMAPUR

Christmas Book Fair

9 - 21st SEPTEMBER 2024
9:30 AM - 5:30 PM
 (Sunday Closed)

📍 O.M Books, A.H Road, opp. Dimapur Sumi Baptist Church, Chakhesang colony, Dimapur.
 ☎ 98620 08081

A collection of 9 Valuable Books

1. Every day with Jesus - 299
2. Quick Scripture Reference for Counseling - 249
3. How to Read the Bible For all its worth - 249
4. 101 Bible Lessons - 325
5. Fire of Revival - 99
6. Peace with God - 225
7. Heart of Christian Leadership - 199
8. Preparing Expository Sermons - 275
9. New Evidence that Demands A Verdict - 949

2557, offer Price 1950/-

पावरग्रिड POWERGRID

SANGDONGER

Petition-1: Combined asset under Radial Interconnection between India (NER) aser Bangladesh-Indian Portion, Petition-2: Missing Link Transmission System kübok Asset Petition-3: Provision of Spare Transformers and Reactors kübok Combined Asset Petition-4: North Eastern Region Strengthening Scheme-II (NERSS-II) Part-A in the North Eastern Region kübok Combined assets asoshi 2019-24 atema Transmission tariff bener arutsü aser 2024-29 tariff block atema transmission tariff determination atema temepishiba benoker

1. Temalen shisema aliba Transmission system beneficiaries temji: (a) Assam Power Distribution Company Limited (b) Meghalaya Energy Corporation Limited (c) Government of Arunachal Pradesh (d) Power and Electricity Department, Mizoram (f) Electricity Dept. of Puducherry (g) DOP, Nagaland (h) TSECL (i) BPDB

2. Tariff details:

Petition No.	Asset details	DOC/ECOD	Completion Cost as on 31.03.2024		Rs. in lakhs				
					2019-20	2020-21	2021-22	2022-23	2023-24
Petition -1	Com-bined Asset	22.03.2016	9098.37	Revised AFC based on truing up	1457.10	1410.81	1371.01	1336.31	1303.62
Petition -2	Com-bined Asset	01.04.2011	7247.35	Revised AFC based on truing up	1242.09	1211.69	1181.04	1150.51	823.98
Petition -3	Com-bined Asset	04.11.2013	1138.41	Revised AFC based on truing up	199.93	194.81	190.18	186.74	183.89
Petition -4	Com-bined Asset	05.05.2016	2718.81	Revised AFC based on truing up	611.44	609.16	604.68	603.53	603.70

b) 2024-29 Block

Petition No.	Asset detail	Completion Cost as on 31.03.2029		Rs. in lakhs				
				2024-25	2025-26	2026-27	2027-28	2028-29
Petition -1	Com-bined Asset	9098.37	AFC	1290.90	1249.47	1200.49	1105.61	734.45
Petition -2	Com-bined Asset	7247.35	AFC	737.95	745.63	756.53	768.07	780.48
Petition -3	Com-bined Asset	1138.41	AFC	193.09	190.26	153.02	153.63	154.62
Petition -4	Com-bined Asset	2718.81	AFC	527.81	524.83	521.99	519.87	518.76

a) 2019-24 block

Tariff determination atema yangluba application indang copy ka applicant indang website www.powergrid.in. nung inokja lir.

4. Tariff determination dak sendakba nung tashishiba mesüra teshidangnuba kar danga lira iba ya beneficiary densema nisung masi kati Secretary, Central Electricity Regulatory Commission, 6th, 7th & 8th floor, Tower B, World Trade Centre, Naorji - Nagar, New Delhi 110029 (or other address where the office of the Commission is situated) dangi copy ka den applicant dangi iba osang sangdongba sülen anogo 30 tsüingda file sütettsü.

Place: Gurugram **Sd/-**
Date : 13.09.2024 **Chief General Manager (Commercial/RC)**

POWER GRID CORPORATION OF INDIA LIMITED
 (A Government of India Enterprise)
 Corp. Office : "Saudamini", Plot No. 2, Sector-29, Gurugram-122001, (Haryana) Tel : 0124-2571700-719
 Reg. Office : B-9, Qutab Institutional Area, Katwaria Sarai, New Delhi-110 016, Tel : 011-26560112, 26560121
 www.powergrid.in, CIN : L40101DL1989G0038121

A MAHARATNA PSU

Naomi Osaka aser Coach Wim Fissette na pilaogo



Coach Wim Fissette & Naomi Osaka

Rongjui/September 14, 2024 (Agencies): Japan tsür nungtu tennis asayar Naomi Osaka aser la indang Belgian coach Wim Fissette na pilaogo, ta taoba mapang world number one asayar yagi Hokolbarnü Instagram ajanga metetdaksü.

"Küm 4, Slam 2 aser teti menungra bilemettsüsa tajangshiba tajung aika ajangshio," ta Osaka-i la indang Instagram story nung zülutsü. "Wim kanga pelar, na ya coach tajung ka aser iba dang nungi ano nisung ang tajungba ka lir. Tarutsü nung na takok tajung nguyonga aotsü imjala atar," ta laisa zülutsü.

Fissette aser Osaka na

anaben tashi inyakogo. Mezüngbuba ya 2019 küm tenzük aser 2022 küm tashi inyka liasü. Iba sülen ano Osaka taoba küm July ita nungi asayashi tenzükba sülen tena longjem.

Osaka-i Fissette tawabangba kübok 2020 US Open aser 2021 Australian Open kokogo aser 2020 Cincinnati Open aser 2022 Miami Open final tonga asaya liasü.

Ajisüaka Grand Slam pezü tashi koker aliba asayar ya tanur soa mapang tatsüka masayai lir asaya tenzükshiba sülen nungi takok tajung monguteti arudar. La January

ita Brisbane nung WTA Tour nungi asaya tenzüka liasü.

Taoba ita US Open mezüngbuba round nung lai Jelena Ostapenko madak takok anguba ya küm pezü tsüingda mezüngbuba top-10 asaya ka akokba liasü. Iba sülen tanabuba round nung la 52nd-ranked Karolina Muchova-i tsükdakja liasü.

"Ni tang junga masayateti arudar aser asaya result ajanga aji sayur," ta lai Muchova makokba sülen ashi.

"Ni tang takaraba asayar ama bilemer saka ni tanabuba round nung tsükatok, anungji agizüksü terabo tasak," ta Osaka-i shisem, shiba tang world rankings nung jenjang 75buba nung lir aser asayamung 16 nung lai quarter-finals ana dang tonga asayar lir.

Osaka-i ashiba agi, lai takok tashi tamakoktem agizüksü meranger saka khen khenbo tezü adanger.

"Ni tanga mapang dang nungi tang temerangba inyaker ama bilemer anungji langkabosa ajangzüksü imlar," ta lai shisem.

Juan Mata Western Sydney Wanderers nungi asayatsü

Rongjui/September 14, 2024 (Agencies): Taoba mapang Chelsea aser Manchester United midfielder Juan Mata-i Honibarnü, pa asayatsü aliba club tasenba Western Sydney Wanderers nungi pai junga asayatetsü ta temulung lema bilemba lemsatepogo.

Arishi küm 36 tain Spain nunger World Cup koker aliba asayar yagi iba A-League club den küm ka atema tenangzüktepba yangluogo. Pa taoba season Japan nung Vissel Kobe team nung dena liasü saka pa iba team nungi khen dang asaya liasü.

Japan nung asayatsü maangka manguba indang asüngdangba mapang Mata-i iba ya otsü talangka lir ta ashi.

"Ni imlaba ama asayatsü asoshi mapang peria manguba ya tezüdangtsüka liasü," ta pai Sydney tonga aruba sülen ashi.

Mata-i ashiba agi, pa temang anema dang lir aser off season

nung pa Danish club FC Nordsjaelland den training agia liasü aser iba sülen Wanderers nungi asayatsü atema telemtetba agia liasü.

"Ni meyaipa arur asayatsü renema lir ama bilemer aser asayaba moapui ia asayatsü yongya atar. Season kanga tajung ka asütsü ta temulunglema bilemer," ta pai ashi.

"Ni tang tashi nung kü career atema pelar, saka ni ano tali asayatsü tejangraba lir aser iba club nungi takok maroktem nguyonga aotsü imla atar," ta paisa shisem.

Mata-i 2010 küm Spain nungi asayaba mapang World Cup kokogo aser küm ana sülen ano kasa team nungi European Cup koka liasü.

Maneni pai Chelsea nungi asayaba mapang Champions League kokogo aser ano Chelsea aser Manchester United naprongla nungi Europa League kokogo.

Asian Champions Trophy: India-i goal 2-1 agi Pakistan kokogo

Rongjui/September 14, 2024 (Agencies): Tang Moqi, China nung asaya aliba Asian Champions Trophy hockey tournament nugn Honibarnü India team-i goal 2-1 agi Pakistan koka league nung khen danga tamakok mongui semifinal tongtetogo.

India captain Harmanpreet Singh tejakdang sür team ania pai goal ana idakja Pakistan madak takok ngua liasü. Iba asaya nung Pakistan atema Ahmad Nadeem-i minute 8buba nung mezüngbuba goal idaktsü liasü.

Harmanpreet-i goal anapronagla ya penalty corners mapang drag-flicks ajanga idakja liasü.

Iba asaya makokba ya Pakistan team asoshia iba asayamung nung mezüngbuba asaya makokba liasü aser parnoka semifinal-i iogo.

Iba asaya akokba sülen India-i 2016 küm nungi Pakistan team amokbanger

asaya arua aliba atsülangshio. Team ana tatemsa taoba küm Hangzhou Asian Games nung asayaba mapang India-i goal 10-2 agi asaya koka liasü.

Iba masüdüng taoba ACT koba Chennai nung asaya liasü iba asayamung nunga India-i goal 4-0 agi Pakistan team koker liasü.

Team anapronglai kanga junga asaya tenzük. India-i asaya tashi ita tenzük saka Pakistan team-i parnok asaya dak tali temulung lemteta küma parnoki mezüngbuba goal idaktsü. Hannan Shahid-i midfield nung kanga junga asaya pass agütsüba sülen Nadeem-i goal idakja liasü.

Iba sülen minute 13buba nung India team nem penalty corner ka agütsü koba Harmanpreet-i idakja liasü. Maneni Harmanpreet-isa minute 19buba nung tanabuba goal idakja parnok goal 2-1 agi tejakdang aküm.

Tanabuba quarter nung

India team possession tajungba liasü saka Pakistan team-ia goal idaktsütsü asoshi maangka aika nguteta liasü. Half-time tatonger dang lia Pakistan team-i penalty corner kanga ajanga goal ka tera agi dang midaktsü.

Asaya tanabuba shilem nunga minute 37buba nung India nem penalty corner ka agütsü, saka Pakistan nunger defense-i kanga junga nokdanga liasü. Iba sülen Pakistan team nem penalty corners pezü agütsü saka parnoki India team defence tsükpoka miteti asaya makok.

Toktepbaba asayaba mapang Pakistan nunger asayar Ashraf Waheed Rana-i India nunger asayar Jugraj Singh tsüktokba atema yellow card ka agütsü aser minute 10 suspend süja liasü. Kasa mapang nung asaya atemtsü minute pongu anunga lia India nunger asayar Manpreet Singh nema yellow card ka agütsü liasü.

Vietnam Open: Kapila shirangba ajanga semi masayatsüsa aküm



Dhruv Kapila

Rongjui/September 14, 2024 (Agencies): India nunger badminton tarep temeyoktep asayar Dhruv Kapila aser Tanisha Crasto na tang asaya aliba Vietnam Open Super 100 asayamung nung kanga junga asaya tuya liasü, saka tia maka Kapila temang mejungi akümaba ajanga tena Honibarnü semifinal asayatsü aliba masayatet.

Seeded sixth, Kapila aser Crasto na Honibarnü semifinal nung Indonesia nunger tarep Adnan Maulana aser Indah Cahya Sari Jamil na den asayatsü liasü.

Ajisüaka Kapila tanen makai temang meta shirangba aser teberem cramp asüba ajanga pa masayatetsüsa aküm.

"Ni asayamung tenzükba anogo nungi temang mejungi liasü," ta Kapila-i PTI dang

ashi. "Ni kanga meranga asayadangogo saka yashi asayaba sülen temang tamajungba aküm. Temang meta shirangba manener aser teberem nung cramp kanga atur. Doctor den sensak asema sülen onoki iba asaya nung shilem magütsü telemtetba agia liasü," ta pai ashi.

Tena iba asaya nung masayaba sülen India nunger asayar ajak iba asayamung nungi tuguogo, kechiyong tena tatembangbuba asayar liasü.

Asayamung tembanga masayatetsüsa akümaba sülen Kapila aser Crasto na tanga asayamungtem dak rangloker lir aser tena Bendigo International (October 9-13) aser Sydney International (October 16-20) nung asayatsü sentong lir.



Qingdao, China nung September 18 nungi 23 tashi asayatsü aliba taruba U-23 Asian Beach Sepaktakraw Championship nung shilem agütsü atema Nagaland nungi Sepaktakraw asayar 5 aser team official ka shimogo. Team ya Kolkata nungi September 16 nü apusotsü. Asayar tem tabelen nungi: Mudutso Dozo, Angshan Konyak, Mongshai, Holshe Khrieo (Team official), RukuvinuTsukru aser Sezovelu Dozo.

BILEMDANGANG

"Tangar anepaludang na anepalutsü tamatok."